



Na osnovu člana 80. Zakona o visokom obrazovanju u Hercegovačko-neretvanskom kantonu ("Službene novine Hercegovačko-neretvanskog kantona broj: 4/12), člana 146. i 154. Statuta Univerziteta, te odluke Senata Univerziteta broj: 101-1-1780/23 i 101-1-1783/23 od 25.5.2023. godine uz saglasnost Ministarstva obrazovanja, nauke, kulture i sporta HNK, broj: 03-34-1153-1/23 od 1.6.2023. godine, Univerzitet "Džemal Bijedić" u Mostaru, objavljuje

KONKURS

za upis studenata u prvu godinu prvog i drugog ciklusa studija na Univerzitetu "Džemal Bijedić" u Mostaru u akademskoj 2023/2024. godini

1. Konkurs za upis u prvu godinu I ciklusa studija u akademskoj 2023/2024. godini je otvoren od 5.6.2023. do 3.7.2023. godine.

Konkurs za upis u prvu godinu II ciklusa studija u akademskoj 2023/2024. godini je otvoren od 5.6.2023. godine do 3.11.2023. godine.

U prvu godinu studija u akademskoj 2023/2024. godini kandidati se upisuju u skladu sa Planom upisa studenata.

2. Pravo na upis i status studenta **dodiplomskog studija** (bachelor, I ciklus) imaju sva lica koja su završila četverogodišnju srednju školu u Bosni i Hercegovini, kao i lica koja su završila četverogodišnju srednju školu u inostranstvu.

Kandidati koji su srednju školu završili u inostranstvu, uz prijavu na konkurs, podnose obrazovne isprave i rješenje o ekvivalenciji, odnosno nostrifikaciji, a ako je postupak u toku, dostavljaju dokaz o podnesenom zahtjevu.

Univerzitet će osigurati pristup studiju stranim državljanima i licima bez državljanstva u skladu s načelima evropskog sistema visokog obrazovanja, osiguravajući im studij pod istim uvjetima kao i državljanima Bosne i Hercegovine.

3. Pravo upisa na **diplomski studij** (master, II ciklus) imaju kandidati sa završenim odgovarajućim dodiplomskim studijem koji se vrednuje sa najmanje 180 (3+2) ECTS odnosno 240 (4+1) ECTS studijskih bodova, te kandidati sa završenim četverogodišnjim studijem po predbolonjskom sistemu studiranja, što se bliže definiše studijskim programom.

Kandidati za upis na diplomski studij, u pravilu, moraju imati najmanju prosječnu ocjenu 7,5 (C+) ostvarenu na dodiplomskom studiju, a ukoliko nisu ostvarili traženu prosječnu ocjenu, potrebno je da dostave dvije preporuke nastavnika, koji su im bili predmetni nastavnici na dodiplomskom studiju.

Kandidati koji ispunjavaju prethodno navedene uslove imaju pravo upisa na studijski program koji je srodan završenom dodiplomskom studiju, uz polaganje jednog ili više diferencijalnih ispita i pod uslovima koje utvrđuje naučno-nastavno vijeće fakulteta/univerzitetskog studija, koji realizuje studijski program diplomskog studija.

Strani državljani i osobe bez državljanstva imaju pravo upisa na studij pod jednakim uslovima kao i državljani BiH.

4. Za prijavu na Konkurs za upis u prvu godinu studija kandidat je dužan predati sljedeće dokumente:

a) prvi ciklus (dodiplomski studij)

- Zahtjev za upis u kome je tačno naznačen studijski program na koji konkuriše;
- Originalna svjedočanstva o završenim razredima srednje škole i originalnu diplomu o završenoj srednjoj školi u Bosni i Hercegovini u četverogodišnjem trajanju odnosno odgovarajuća nostrificirana dokumenta za kandidate koji srednju školu nisu završili u Bosni i Hercegovini (ukoliko su dokumenti u postupku nostrifikacije prilaže se dokaz o podnesenom zahtjevu za nostrifikaciju);
- Izvod iz matične knjige rođenih (original ili ovjerena kopija originala);
- Uvjerenje o državljanstvu (original ne starije od 6 mjeseci) i
- Druge dokumente relevantne za utvrđivanje broja bodova po kriterijima.

b) drugi ciklus (diplomski/master studij)

- Zahtjev za upis u kome je tačno naznačen studijski program na koji konkuriše;
- Diploma ili uvjerenje o završenom prvom ciklusu studija iz odgovarajuće oblasti, odnosno dokaz o podnesenom zahtjevu organizacionoj jedinici Univerziteta na kojoj želi nastaviti svoje obrazovanje za priznavanje strane visokoškolske isprave, kvalifikacije i perioda studija¹;
- Uvjerenje o položenim ispitima ili dodatak diplomi (original ili ovjerena kopija originala);
- Izvod iz matične knjige rođenih (original ili ovjerena kopija originala);
- Uvjerenje o državljanstvu (original ne starije od 6 mjeseci) i
- Drugi dokumenti u skladu sa Pravilima studiranja na II ciklusu studiju na Univerzitetu "Džemal Bijedić" u Mostaru, objavljenim na web stranici Univerziteta.

Kandidati koji su studije završili u inostranstvu uz prijavu na konkurs podnose obrazovne isprave i rješenje o ekvivalenciji, odnosno nostrifikaciji, a ako je postupak nostrifikacije u toku dostavljaju dokaz o podnesenom zahtjevu. Pravo na upis kandidat stiče nakon donošenja rješenja o nostrifikaciji.

Nepotpune i neblagovremeno podnesene prijave neće se uzimati u razmatranje.

5. Prijemni ispit, na organizacionim jedinicama/univerzitetskim studijima na kojima se polaže, obaviti će se prema terminu, rasporedu i satnici koje će utvrditi organizacione jedinice/univerzitetski studiji pojedinačno, i oglasiti na svojim oglasnim pločama i web stranicama uz detaljne informacije o istom.

6. Kriteriji i mjerila za utvrđivanje redoslijeda za prijem kandidata za upis u prvu godinu prvog i drugog ciklusa studija na organizacione jedinice/univerzitetske studije Univerziteta "Džemal Bijedić" u Mostaru će biti objavljeni na oglasnim pločama i web stranicama organizacionih jedinica/univerzitetskih studija. Rang listu svih kandidata i spisak primljenih kandidata organizacione jedinice/univerzitetski studiji će objaviti na oglasnoj ploči i web stranici nakon što ista bude verifikovana.

7. Na objavljenju rang listu kandidati mogu uložiti pismeni prigovor Naučno-nastavnom vijeću organizacione jedinice/univerzitetskog studija u roku od 3 dana od dana objavljivanja iste. Naučno-nastavno vijeće organizacione jedinice/univerzitetskog studija je dužno u roku od 3 dana odlučiti o prigovoru i o tom obavijestiti kandidata. Odluka Naučno-nastavnog vijeća je konačna.

¹ U skladu s Pravilnikom o priznavanju stranih visokoškolskih obrazovnih isprava, kvalifikacija i perioda studiranja u cilju nastavka obrazovanja na Univerzitetu „Džemal Bijedić“ u Mostaru, dostupno na: www.unmo.ba

8. Organizacione jedinice/univerzitetski studiji će na svojim oglasnim pločama i web stranicama objaviti detaljne informacije o mjestu i vremenu predaje dokumenata na Konkurs.

9. Upis studenata koji budu primljeni na organizacione jedinice/univerzitetske studije obaviti će se nakon oglašavanja konačne rang liste primljenih kandidata.

10. Za upis na visokoškolske ustanove **primljeni kandidati** podnose:

- upisni i prijavni list (ŠV obrazac)
- upisnicu - index
- dvije fotografije
- ljekarsko uvjerenje o zdravstvenom stanju studenta (izdaje ga odgovarajuća zdravstvena ustanova ne starije od 6 mjeseci)
- dokaz o uplati školarine i drugih usluga za studente Univerziteta „Džemal Bijedić“ u Mostaru.

Prijave za upis kandidati podnose u studentskim službama fakulteta.

Prijave za upis studenata u prvu godinu prvog ciklusa (dodiplomskog, bachelor) i drugog ciklusa (diplomskog, master) Univerzitetskog studija Dizajn interijera, kao i integrisanog studija Farmacija kandidati podnose u studentsku službu Nastavničkog fakulteta Univerziteta „Džemal Bijedić“ u Mostaru.

Prijave za upis studenata u prvu godinu Univerzitetskog studija Zdravstvena njega kandidati podnose u studentsku službu Agromediteranskog fakulteta Univerziteta „Džemal Bijedić“ u Mostaru.

Prijave za upis studenata u prvu godinu prvog ciklusa (dodiplomskog, bachelor) i drugog ciklusa (diplomskog, master) Studija turizma i studija Poslovna informatika kandidati podnose u studentsku službu Ekonomskog fakulteta Univerziteta „Džemal Bijedić“ u Mostaru.

Broj: 101-1784/23

Mostar, 25.5.2023. godine

**PREDSJEDAVAJUĆA SENATA
UNIVERZITETA „DŽEMAL BIJEDIĆ“ U MOSTARU**


prof. dr. Alena Huseinbegović, rektorica

